

2022KO AZAROAREN 23KO OSOKO BILKURAKO AKTA.

Tokia: Berako Herriko Etxea.
Eguna: 2022-11-23.
Hasiara ordua: 19:30.
Bilkura mota: ohikoa, 1. deia.

BERTARATUAK:

EH BILDU

Jose Esteban Aguirre Zubieta
Maialen Chantre Irazoki
Patxi Castillo Graciarena
Ines Rosario Matxiarena Aldalur
HERRIRAKO
German Castillo Lazcanotegui
Jose Antonio Oyarzabal Iribas
Raquel Quiroga Tapia

EZ EGOTE JUSTIFIKATUAK:

Bat ere ez

ALDEZ AURRETIK JUSTIFIKATU GABEKO EZ EGOTEAK:

Estibaliz Pinacho Olaciregui
Julen Errandonea Martin

ALKATEA (Bilkurako buru):

Aitor Elexpuru Egaña

IDAZKARIA: Miguel Jose Belarra Tellechea, ekintzaren akta jasotzen du.

KONTU-HARTZAILEA: Maria Dolores Oyarzabal Zubieta

EZTABAIDATUTAKO GAIK (behar bezala egindako deialdiaren Gai Zerrendan sartu zirenak):

1. AURREKO BILKURAKO AKTAREN ONARPENA.

Alkateak galdetu du zinegotziren batek oharren bat egin nahi ote dion deialdiarekin batera banatu zen aurreko bilkurako aktari (2022-10-19). Inork ez du azalpenik egin eta **aho batez** onartu da akta.

2. 2023KO AURREKONTU OROKORRA. HASIERAKO ONESPENA.

Kontu-hartzaileak aurrekontuaren laburpena azaldu du, gastuen zein diru-sarreraren adierazpena eginez.

Ondoren, honako azalpen hau egin du alkateak (aktan jartzeko idatzita eman duen agiria irakurriz):

2023 urterako aurrekontuak onartu behar ditu Berako udalak. Guztira 3.954.228,13 eurokoa izanen da. Iaz baino 330.128,16 euro gutxiago. Aurtengoan ezin izan ditugu kontuak berdinu mailegurik aurreikusi gabe. 47.652,77 euroko mailegu bat hartzea aurreikusi da. Aurten bezala ere, beharrik ez badago ez da erabiliko. Nolanahi ere udalaren zorra gutxitzen segituko da 2022an. Aurten bukatu dugu mailegu bat ordaintzeaz, eta gelditzen zaizkigun maileguen amortizaziorako 49.240,84 euro jarri dira.

Ukraniako gerra dela eta fiskalitate erregelak bertan behera geldituak egon, aurrekontuak egiterakoan estabilitatearen legea kontuan izan behar dugu (aurrekontuaren estabilitatea eta zor publikoaren helburua) nahiz eta ez betetzeak ondorioz ez dakarren. 2022ean gerakina erabiltzeko aukera izan dugu hainbat inbertsioetarako. Heldu den urtean ere aukera hori aurreikusten da, eta denboragatik edo bertze arrazoiren batengatik, aurten ezin izan ditugunak burutu, 2023an burutzeko asmoa dugu. Pandemiaren egoera hobetu denean gerran dago Europa, eta ziurgabetasunean bizi gara. Horren ondorio dira energiaren kostua izugarri igo dela, eta bizitza orokorrean garestitu egin da.

Langilegoari dagokionez 2022 urtean %3,5eko igoera izan dute soldatek eta 2023an %1,5ekoa izango da. Beraz, %5ean geldituko da soldaten igoera.

Urak eramanen dituen langile bat %75ean kontratatzeko dirua aurreikusia dugu. Baina hau orain eszedentzian dagoen langilea noiz bueltatuko den, horrek baldintzatuko du.

Aparejadoreak %20ko murrizketa eskatu du, arkitekto lanetarako formakuntza bat egiteko 2023 urtean.

Iaz Bortziri mailan berdintasun teknikaria kontratatu zen bezala, aurten bertako produktuen ekoizleak eta kontsumo taldeen dinamizatzailea kontratatu da Malerreka-Bortziri mailan. 6.000 euro pasatxo jarriko du udalak.

Tasei dagokionez aipatu behar dugu, %3a igoko direla. Ez da igoera erranguratsua, ikusita gaur KPIa ia horren hirukoitza dela, %8tik goiti alegia, eta heldu den urtean ere antzera jarraituko duela.

Orain bi urte Toki-erakundearen finantziario sistema berria adostu zuen Nafar Gobernuak parlamentuko gehingoarekin. Nafarroako Gobernuak Toki-Ogasun Funtza, hau da udalei banatzen zaien fondoa, diru sarrera garrantzitsua da. Funtzaren banaketa justuago bat ahalbidetzen da eta Udal finantziarioa hobetuko du honek. Aurten 1.200.000 euro espero ditugu.

Inbertsioei aurre egiteko nahitaezkoak ditugu dirulaguntzak. Tokiko Inbertsioen Plan-era aurkeztu ditugu gure beharrak. Diru hau ur hornidura eta zoladura hobetzeko erabili nahiko genuke, atal honetan herriak behar handiak dituelako. Ur hornidura sareetan Kanttonberri, Ileketa eta Legiako sareak lehenesten ditugu, eta azpiegituretan igerilekuak. Urte bukaerarako jakinen dugu zein proiektu diruz lagunduko diguten, eta horren arabera egin beharko da inbertsioa.

Heldu den urtean Zalain-Foruen Plaza ur sareak berrituko ditugu, 500.000 euro inguruko inbertsioa da, %80a Nafar Gobernuak diruz lagunduko du.

Beraz Inbertsiotarako ia 500.000 euro bideratu dira. Bertan udal eraikinen mantentzea (ikastetxeak eta kirol instalazioak), espaloiak moldatzea, mendi eta abeltzaintza proiektuak eta abar luze bat sartzen ditugu.

Mendi garbiketa eta nekazal azpiegituren moldaketetarako 130.000 euroko dirusarrerak espero ditugu. Diru laguntza egonez gero egingen dira lan hauek, bertzela gastuetan aurreikusten dugun dirua bertze inbertsiotarako bideratuko da.

Haurtzaindegi ondoan dagoen haur parkea, harrizko parkea deitzen zaiona, berritzeko asmoa dago. Horretarako 60.000 euro jarri dira.

Eztegara-Matzada loturaren lanetarako 885.000 euro lortu dira Madrileko aurrekontuen negoziaketan, eta sahiesbidearen hurrengo bi tramoen proiektuak egiteko 100.000 euro.

IDAera diru laguntza eskatua dugu kiroldegiko teilatuan autokontsumorako plaka fotoboltaikoak paratzeko. 40.000 euroko kostua luke proiektu honek, eta IDAetik %85eko finantziazioa lortu ahal da.

Musika eskolaren kasuan Nafar Gobernuaren aldetik finantziazioa hagitik eskasa da. Hasiera batean %33ko dirulaguntza aurreikusten zen baina gaur egun %15 ingurukoa da Iruñeatik iristen dena. Udalak ahalegin handia egiten du musika eskolaren bideragarritasun ekonomikoan, eta defizitari aurre eginez. 200.000 eurotik goiti jarriko ditu.

Funtzionamendu gastuak: iazko partida gehientsuak mantendu dira eta egon den ejekuzioa kontutan hartuta batzuk haunditu dira eta bertze batzuk txikiatu. 2022tik kirol instalazioak Udalak sortutako sozietate publiko baten bitartez kudeatzen dira, 105.000 euro jartzen ditu udalak.

Kultur eta besten programaziorako partidetan diru gehiago jarri da. 5.000 euro gehiago bi ataletan iazkoakin alderatua. 55.000 euro kultur programaziorako (honetaz aparte, kultur taldeei diru laguntzetan bertze 15.000 euro banatzen ditu), eta 75.000 euro bestetarako.

2010ean 203.000 euroko aurrekontua zuen Bortzirietako Euskara Mankomunitateak. 2022an 353.000 euro eta heldu den urtean 375.000 euro. 2023an Bortzirietako Euskara Mankomunitaterako 143.000 euro jartzea egokitzen zaio gure udalari. Iaztik 20.000 eurotan igo da gure ekarpena. Euskararen alde udalak esfortzu handia egiten du, Euskara Mankomunitatea babesten. Nafar Gobernu eta Euskarabidetik ez dugu ia sosik jasotzen, eta dena udalen esku gelditzen da. Jendarteak hau jakin dezan garrantzitsua deritzogu.

Bortzirietako Gizarte Mankomunitaterako ere 20.000 eurotan igoko da Berako udalaren ekarpena. Guztira 120.000 euro jarriko dira.

Gure herriaren tamaina ikusita, hainbat zerbitzu ditugu, eta harro egoteko moduan gaude. Afera da zerbitzu horiek mantentzeko udalak ahalegin ekonomiko handia egin behar duela, eta gastu handiak ditu. Eskola publikoa, kirol zerbitzua eta eraikinak, gizarte zerbitzuak, musika eskola, osasun etxea, liburutegia eta kultur etxea., Berdintasun zerbitzua, Euskara Mankomunitatea...eta gastu hauek inbertsiotarako dirua murrizten dute,

diru laguntzen menpe gelditzen garelarik.

Horrela ba 2023. urtea ere bete bete datorrela erran dezakegu. Udala ekonomikoki sobera behartu gabe saiatuko gara ahalik eta hobekien gure aurreikuspen hauek antzinera ateratzen, zentzuzko kudeaketa ekonomiko bat garatuz. Udalaren zorra jaisten segiko dugu, baina diru-sarrerei muzin egin gabe.

Azkenik, aurrekontu proiektu hau proposamen bat besterik ez dela azpimarratu nahiko genuke. Urtea nola joaki den aldaketak egon ahal dira diru kontuen antolakuntzan. Aldaketa eta ezusteko hauek, Udalbatza osatzen dugun guztien artean adostasunetara iritsiz burutu nahiko genituzke.

Jarraian, idazkariak azaldu du aurrekontuaren espedienteak jarraitzen duen prozedura.

Ondoren, erabaki hau hartu dute **aho batez**:

Ikusirik 2023. ekitaldiko aurrekontu orokorraren proiektua, non Udalaren aurrekontua eta "Isidoro Fagoaga" Musika Eskolaren Patronatuarena sartzan baitira, baita Sastrako Kirol Zerbitzuak SL enpresa publikoaren gastuen eta diru-sarreraren aurreikuspenak ere.

Kontu-hartzailearen ahozko txostena eta idazkariaren txosten juridikoa aztertuta, eta Nafarroako Toki Ogasunei buruzko 2/1995 Foru Legearen 201. eta 202. artikuluetan ezarritakoaren arabera, honako hau

ERABAKI DA:

1. Hasierako onespina ematea 2023. ekitaldiko aurrekontu orokorrari. Honako hau da laburpena:

Udala.

DIRUSARRERAK:

Kapitulua	Izenburua	Zenbatekoa eurotan
I	Zuzeneko zergak	1.383.478,37
II	Zeharkako zergak	100.000,00
III	Tasak, prezio publikoak eta beste diru-sarrera batzuk	441.914,69
IV	Transferentzia arruntak	1.731.114,01
V	Ondare-sarrerak eta aprobetxamenduak	31.119,84
VII	Kapital-transferentziak	218.948,45
IX	Finantza-pasiboak	47.652,77
	Dirusarrerak, guztira	3.954.228,13

GASTUAK:

Kapitulua	Izenburua	Zenbatekoa eurotan
I	Langile-gastuak	1.330.875,23
II	Ondasun eta zerbitzuetako gastu arruntak	1.355.932,62
III	Finantza-gastuak	8.920,04

IV	Transferentzia arruntak	776.061,93
VI	Inbertsio errealak	407.097,47
VII	Kapital-transferentziak	26.100,00
IX	Finantza-pasiboak	49.240,84
	Gastuak, guztira	3.954.228,13

Musika Eskolaren Patronatua.

DIRUSARRERAK:

Kapitulua	Izenburua	Zenbatekoa eurotan
III	Tasak, prezio publikoak eta beste diru-sarrera batzuk	92.000,00
IV	Transferentzia arruntak	263.741,20
V	Ondare-sarrerak eta aprobetxamenduak	5,00
VII	Kapital-transferentziak	3.000,00
	Dirusarrerak, guztira	358.746,20

GASTUAK:

Kapitulua	Izenburua	Zenbatekoa eurotan
I	Langile-gastuak	326.666,20
II	Ondasun eta zerbitzuetako gastu arruntak	29.020,00
III	Finantza-gastuak	60,00
VI	Inbertsio errealak	3.000,00
	Gastuak, guztira	358.746,20

2. Espedientea jendaurrean jartzea hamabost egun balioduneko epean, aldez aurretik Nafarroako Aldizkari Ofizialean eta udal iragarki-oholean iragarrita, nahi duenak aztertu eta erreklamazioak egin ditzan.

3. Ohartaraztea jendaurreko epealdian erreklamaziorik ez balego, aurrekontua behin betiko onetsizat hartuko dela.

Kontu-hartzailea bileratik atera da.

3. UDALEKO ETA "ISIDORO FAGOAGA" UDAL MUSIKA ESKOLAREN PATRONATUA ERAKUNDE AUTONOMOKO LANGILEEN PLANTILLA ORGANIKOA 2023. URTERAKO. HASIERAKO ONESPENA.

Ikusirik 2023. urteko plantilla organikoaren espedientea, Udaleko eta "Isidoro Fagoaga" Udal Musika Eskolaren Patronatua erakunde autonomoko langileek barnean hartzen dituen.

Kontuan izanik idazkariaren txosten juridikoa eta aplikagarria den araubide hau: Nafarroako Toki Administrazioari 6/1990 Foru Legearen 235. artikulua; Nafarroako Toki Ogasunei buruzko 2/1995 Foru Legearen 201. eta 202. artikulua; 251/1993 Foru Dekretu Legegilearen (Nafarroako Administrazio Publikoen zerbitzuko Langileriaren Estatutuaren

Testu Birbildua) 19. eta 20. artikulua; Euskarari buruzko 18/1986 Foru legearen 15.2 artikulua; 103/2017 Foru Dekretuaren 22. eta 28. artikulua (euskararen erabilera arautzen du Nafarroako administrazio publikoetan, beren erakunde publikoetan eta menpeko dituzten zuzenbide publikoko entitateetan),

aho batez ERABAKI DA:

1. Hasierako onespena ematea Udaleko eta "Isidoro Fagoaga" Udal Musika Eskolaren Patronatua erakunde autonomoko langileen 2023rako plantilla organikoari, espedientean jasotako edukiarekin. Euskara jakitea nahitaezkoa izanen da organismo autonomo eta Udaleko edozein lanpostu eskuratzeko, funtzionarioenak zein kontratatuenak, finkoak edo aldi batekoak; lanpostu guztiei esleituko zaie Bortzirietako Euskara Mankomunitateak plantilla organikoetako lanpostuen hizkuntza eskakizunei buruz egindako txostena aplikatzearen ondoriozko euskara maila.

2. Jendurrean jartzea espedientea 15 eguneko aldian, Nafarroako Aldizkari Ofizialean eta udal iragarki-taulan iragarrita, nahi duenak aztertu eta erreklamazioak aurkez ditzan.

3. Ohartaraztea jendurreko epealdian erreklamaziorik ez balego, plantilla behin betiko onetsizat hartuko dela eta haren laburpena argitaratuko dela.

4. UDAL-ZERGEN ZERGA-TASAK 2023KO EKITALDIRAKO.

Kontu-hartzaileak aipatu du tartea dagoela legearen barruan %3 igotzeko udal zerga batzuen tasa.

Gero, espedienteak jarraitu beharreko prozedurari buruzko aipamena egin du idazkariak.

Jarraian, ondoko erabaki hau hartu da:

Kontu-hartzaileak eta idazkaritzak egindako txostenak ikusirik, eta kontuan izanik Nafarroako Toki Ogasunei buruzko 2/1995 Foru Legearen 64. artikulua araberan, udal zergen zerga-tasen aldaketak onetsi behar direla ondorioak izango dituzten urtea hasi baino lehen,

aho batez ERABAKI DA:

1. Zerga-tasa hauek onestea 2023rako:

- Lurraldeko kontribuzioa, %0,255.
- Izaera urbanoko terreneen balio gehikuntzaren gaineko zerga, %19,14. Gehikuntza errearen zenbatekoa finkatzeko, Nafarroako Toki Ogasunei buruzko Foru Legearen 175. artikuluan agertzen diren gehieneko koefizienteak aplikatuko dira.
- Eraikuntzen, instalazioen eta obren gaineko zerga, %5ean mantendu.
- Jarduera ekonomikoen gaineko zerga, 1,40 indizea aplikatu.

2. Erabaki hau argitaratzea Nafarroako Aldizkari Ofizialean eta udal iragarki-taulan.

5. TASA ETA PREZIO PUBLIKOEN TARIFAK 2023KO EKITALDIRAKO. HASIERAKO ONESPENA.

Tasak eta prezio publikoak %3 batean igotzea proposatu da.

Idazkariak espedienteak jarraitu beharreko prozedurari buruzko aipamena egin du eta ohartarazi du Musika Eskolako tarifen sistema ez datorrela bat Nafarroako Toki Administrazioa 6/1990 Foru Legearen 189. artikuluan eta Toki Korporazioen Zerbitzuen Erregelamenduko —1955eko ekainaren 17ko Dekretua— 150. artikuluan xedatutakoarekin.

Jarraian, ondoko erabaki hau hartu da:

Ikusirik:

- Tasa eta prezio publikoen tarifak 2023rako aldatzeko espedientea.
- Kontu-hartzaileak eta idazkaritzak emandako txostenak.

- Gai baten alderdi partzialen arauketa izanik, egin gabe utz daitekeela Administrazio Publikoaren Administrazio Prozedura Erkidearen 39/2015 Legeko 133.1 artikulua arautzen duen aurretiko kontsulta publikoa.

Kontuan izanik Nafarroako Toki Administrazioa 6/1990 Foru Legearen 325. artikulua eta Toki Ogasunei buruzko 2/1995 Foru Legearen 13. artikulua xedatzen dutena,

aho batez ERABAKI DA:

1. Hasiera batean onestea honako prezio publiko eta tasen tarifen aldaketa 2023. ekitaldirako, espedientearen ageri den edukiarekin (%3ko igoera):

- Bide publikoko lurpea, hegalkina eta lurzoruaren aprobetxamendu bereziengatiko tasak.
- Agiriak tramitatu eta luzatzeagatiko tasak.
- Udal kirol instalazioak erabiltzeagatiko tasak.
- Jarduera zein irekitze baimenengatiko tasak.
- Animalia arriskutsuak eta bestelakoak edukitzeagatiko tasak.
- Musika Eskolako tasak.
- Saneamendu eta ur-horniduraren agatiko tasak.

2. Erabaki hau jendaurrean jartzea 30 eguneko epealdian, Nafarroako Aldizkari Ofizialean eta udal iragarki-taulan iragarri ostean, herritarrek eta bidezko interesa dutenek espedientea aztertu eta erreklamazio, kexa edo oharrak aurkez ditzaten.

3. Ohartaraztea hasierako onspen hau behin betikoan bilakatuko dela, baldin eta erreklamazio, kexa edo oharrak aurkezten ez bada. Kasu horretan, ondorio juridikoak sortzeko, Nafarroako Aldizkari Ofizialean argitaratuko da gertaera hori, behin betiko testuarekin batera, eta argitaratze datan hartuko du indarra.

4. Nafarroako Gobernuaren Ordenantza Fiskalen Erregistrora bidaltzea aldaketa hauek, behin betiko onespena gauzatu ondoren.

6. INFORMAZIOAREN SEGURTASUN-POLITIKA ONARTZEA.

Alkateak eta idazkariak gaia aurkeztu ondoren, honako erabaki hau hartu da:

Informazioa lehen mailako aktiboa da Berako Udalarentzat, zerbitzu gehienak emateko funtsezkoa den unetik. Bestalde, informazioaren eta komunikazioaren teknologiak gero eta ezinbestekoagoak bihurtu dira administrazio publikoentzat. Hala ere, informazioaren tratamenduari egiten dizkioten hobekuntzek arrisku berriak dakartzate berekin, eta, beraz, beharrezkoa da berriazko neurriak hartzea informazioa eta informazioaren mendeko zerbitzuak babesteko.

Administrazio elektronikoa garatzeko, informazio- eta komunikazio-teknologiaren sistemek informazio ugari tratatu behar dute. Informazioa arrisku eta ahulezia mota desberdinen mende dago, eta sistema horiei eragin diezaiekete. Administrazio Elektronikoaren esparruan Segurtasun Eskema Nazionala (aurrerantzean, SEN) arautzen duen maiatzaren 3ko 311/2022 Errege Dekretuaren helburua da konfiantza ematea informazio-sistemek beren zerbitzuak emanen dituztela eta informazioa beren zehaztapen funtzionalen arabera zainduko dutela, kontrolaz kanpoko etenik edo aldaketarik gabe, eta informazioa baimenik gabeko pertsonak ezagutu gabe.

Segurtasun Eskema Nazionala betetze aldera, Berako Udalak, herritarren eskura jarritako izapide elektronikoen euskarri diren informazio-sistemei eragin diezaieketen arriskuen jakitun, eta kontuan hartuta herritarren eskura jartzen duela bere aktibo baliosuena, bere Informazioa, badaki horiek behar besteko arretaz administratu behar direla, eta neurri egokiak hartu behar direla tratatutako informazioaren edo emandako zerbitzuen eskuragarritasunari, osotasunari edo konfidentzialtasunari eragin diezaieketen ustekabeko edo nahita egindako kalteetatik babesteko.

Bestalde, teknologia berrien erabilera sustatu nahi da Udalean eta herritarrengan. Honako hauek dira, besteak beste, lortu nahi diren helburu nagusiak: herritarrek Udalarekin duten harreman elektronikoa sustatzea, eta harreman horretan herritarren eta Udalaren artean beharrezko konfiantza sortzea.

Informazioaren segurtasunaren helburua informazioa eta zerbitzuak babestea da, jasaten dituzten arriskuak maila onargarri bateraino murriztuz. Erakunde bakoitzaren barruan, gobernu-organo gorenak soilik dituzte maila hori finkatzeko, jarduketak antolatzeko eta horiek gauzatzeko bitartekoak gaitzeko eskumenak. Ildo horretan, lehentasunezko jarduerak dira informazioaren segurtasun-politika bat ezartzea eta, horren ondorioz, zereginen eta erantzukizunen banaketa egitea; izan ere, segurtasuna gobernatzeko bi tresna nagusiak dira, eta ondorengo jarduketak guztietarako erreferentzia-esparrua osatzen dute.

SENERa egokitzeak esan nahi du Berarako Udalak eta bertako langileek SENek berak eskatzen dituen gutxieneko segurtasun-neurriak aplikatu behar dituztela, bai eta zerbitzuak emateko mailen etengabeko jarraipena egin, emandako ahuleziak jarraitu eta aztertu, eta gorabeherei erantzun eraginkor bat prestatu ere, emandako zerbitzuen jarraitutasuna

bermatzeko.

Azaldutako guztiagatik, **aho batez ERABAKI DA:**

1. Berarako Udalaren Informazioaren Segurtasun-Politika onartzea, espedientean jasotako dokumentuaren arabera.
2. Alkatea izendatzea informazio eta zerbitzuen arduradun, eta eginkizun horiek Udaleko idazkariari eskuordetzea.
3. Erabaki honen bidez onartzen den dokumentuan jasotako irizpideak eta jarraibideak lotesleak dira Berako Udaleko antolaketa-unitate guztientzat.
4. Informazioaren Segurtasun-Politika eraginkorra da akordio hau onartzen den egunetik aitzina, eta indarrean egonen da akordio berri batek ordeztzen duen arte.

Informazioaren segurtasunari buruzko politika hau indarrean jartzeak berekin dakar udal arlo, unitate eta zerbitzuetan egon daitekeen beste edozein politika indargabetzea.

5. Informazioaren Segurtasun-Politikaren dokumentuaren bertsio eguneratua mantentzea egoitza elektronikoan.

7. 2022KO AZAROAREN 25EKO ADIERAZPEN INSTITUZIONALA.

Inés Matxiarenak y Maialen Chantrek irakurri ondoren, **aho batez ONETSI DA** adierazpen instituzional hau:

2022ko azaroaren 25eko ADIERAZPEN INSTITUZIONALA. GERTATZEN DA, ETA BADIRA HORREN ERANTZULEAK.

Azaroaren 25ero bezala, elkarretaratzeen, manifestazioen eta adierazpenen bidez berriz ere gogora ekarriko ditugu emakumeen aurkako indarkeria betikotzen duten arrazoiak eta mekanismoak.

Hala ere, zenbait diskurtsotan berriro zalantzan jartzen da indarkeria hori, honako hau esanez: “indarkeriak ez du generorik”. Horren aurrean, azaroaren 25ean, berriz ere azpimarratu nahi dugu indarkeriak baduela generorik eta, gainera, gizartean egiturazkoa den eta errotuta dagoen indarkeria dela. Horrek azaltzen du zergatik ematen den testuinguru kultural guztietan eta maila guztietan. Izan ere, jatorria ulertuta soilik eragin dezakegu hura ezabatzen lagunduko duten egitura-aldaketa sakonak sustatzen. Indarkeria horren egiturazko erroak eta izaera kulturala ukatzeak ez digu aurrera egiten uzten eta ezkututzen du femeninoa denari balioa kentzen dion eta emakumeak mendekotasun-egoeran jartzen dituen gizarte antolaketa bat dagoela. Gizonek eragin eta emakumeek jasaten duten indarkeria da. Horregatik, aurten gizonak premiatzen ditugu gogoeta egin dezaten emakumeen giza-eskubideen kontra doan sistema honetan duten boterearen eta parte hartzearen inguruan.

Azken urteotan gizon askok egin dute bat berdintasun aldarrikapenekin, eta maskulinitate hegemoniko tradizionalak ezarritako genero-aginduak berrikusi dituzte,

gizarte berdinzaleago baten alde egiteko xedez. Hala ere, aurrera egin behar dugu, are gehiago, eta gizon gehiago inplikatu behar dira modu aktiboan, normalizatutako portaerak (norberarenak zein besteenak) eta kultura matxista betikotzen duten sinesmenak identifikatuz eta aldatuz, justifikaziorik gabe eta beste alde batera begiratu gabe.

Emakumeen aurkako indarkeria EGON BADA eta badira erantzuleak, indarkeriaren oinarria diren desberdinkeriak iraunarazi eta birsortzea eragiten duen engranajea elikatzen dutenak. EGON BADA eta badira erantzuleak, emakumeak gutxiagotzen dituen eta aldatzeko prest ez dagoen gizarte androzentriko eta patriarkal batean bizi garelako.

EGON BADA eta badira erantzuleak, indarkeria eragiten, onartzen eta legitimatzen duten gizonak daudelako, beste alde batera begiratzuz eta beraiek bezalako indarkeriazko jarrera matxistak justifikatuz.

EGON BADA eta badira erantzuleak, genero-ikuspegia txertatzea bermatuko duen prestakuntza falta delako, mundua ikusteko modua eraldatzeko, betaurreko moreak jantzita, gizarte-antolaketaren esparru guztietan: judizialean, heziketan, osasunean eta ekonomikoan, besteak beste.

EGON BADA eta badira erantzuleak, komunikabideek erantzukizuna emakumeengan kokatzen duten mezuak zabaltzen dituztelako, arrisku sexualaren gaineko diskurtsoarekin gertatzen den bezala, zeinak emakumeak erasoan errudun eta beren segurtasunaren arduradun egiten baititu.

Horregatik, modu kolektiboan, toki-entitateek honako hau ADIERAZTEN DUGU:

GURE GAITZESPENA, emakumeek edozein esparru eta testuingurutan pairatzen dituzten askotariko diskriminazioek eragindako indarkeria matxista mota orori.

GURE KONPROMISOA, Administrazio Publiko garen aldetik, modu aktiboan lanean jarraitzeko desparekotasunen aurka, emakume zein neskatuen aurkako indarkeria-egoeren sorburu baitira, eta horrekin batera gonbit egitea hala gobernuari eta erakunde publikoei nola nazioarteko entitateei eta gizarte zibilari, gogoeta egin eta konpromisoak har ditzaten.

GURE ELKARTASUNA, eraso edo hil dituzten emakume eta neskatoei, indarkeria matxistari aurre egin behar dioten emakumei eta haien seme-alabei.

GIZON GUZTIAK PREMIATZEN DITUGU, adin orotakoak, konpromisoak eta jarrera aktiboak har ditzaten, emakumeen kontrako indarkeria mota guztien aurrean.

HERRITAR GUZTIAK GONBIDATU NAHI DITUGU jarrai dezaten emakumeen kontrako indarkeria gaitzesten eta hura deuseztatzeko konpromisoa adierazten, baita patriarkatuaren kontrol mota guztiak eta emakumei askatasuna eta autonomia erabiltzea eragozten dieten muga eta baldintza guztiak salatzen ere, eta, hartara, azaroaren 25ean antolatzen diren jarduera guztietan parte har dezaten.

8. URRIAREN 27KO 286/2022 ALKATETZAREN EBAZPENA BERRESTEA. EBAZPEN HORREN BIDEZ ONARTU ZEN KALBARIO ERREKA LURPERATZEAREN TRAZADURA BERRIAREN OBRA-KONTRATUAREN

ALDAKETA.

Urriaren 27ko 286/2022 Alkatetzaren Ebazpenaren bidez onartu zen Kalbario erreka lurperatzearen trazadura berriaren obra-kontratuaren aldaketa, proiektuaren aldaketa bertan sartuz, 66.699,05 euroko zenbatekoan, BEZik gabe —aldaketa horren ondorioz, esleipen aurrekontua 449.814,24 eurokoa izanen da, BEZa kanpo—, baita gauzatze-epea 2023ko urtarrilaren 31ra arte luzatzea ere.

Kontratazio-organoa Osoko Bilkura izanik, **aho batez ERABAKI DA** aipatutako Alkatetzaren Ebazpena berrestea.

9. AZAROAREN 3KO 291/2022 ALKATETZAREN EBAZPENAREN BERRESTEA. EBAZPEN HORREN BIDEZ ONARTU ZEN "ISIDORO FAGOAGA" UDAL MUSIKA ESKOLAREN PATRONATUAREN KUDEAKETA-ESLEIPENA, ALDI BATERAKO ENPLEGUA EGONKORTZEKO ETA FINKATZEKO PROZESU BEREZIAREN BARNEAN, ENPLEGU PUBLIKOAN DAGOEN BEHIN-BEHINEKOTASUNA MURRIZTEKO PREMIAZKO NEURRIEI BURUZKO 20/2021 LEGEAN XEDATUTAKOAREN ARABERA.

Azaroaren 3ko 291/2022 Alkatetzaren Ebazpenaren bidez onartu zen "Isidoro Fagoaga" Udal Musika Eskolaren Patronatua erakunde autonomoak egindako kudeaketa-esleipena eta haren arauak, aldi baterako enplegua egonkortzeko eta finkatzeko ezohiko prozesuari dagozkion lanpostu hutsak betetzeko, 20/2021 Legean xedatutakoaren arabera.

Gaia eztabaidatu ondoren, **aho batez ERABAKI DA** aipatutako Alkatetzaren Ebazpena berrestea.

Jose Antonio Oyarzabal bileratik atera da.

10. BANDOAK ETA ALKATETZAREN EBAZPENAK.

Honako bando eta Alkatetzaren ebazpen hauen jakinaren gainean geratu dira:

- Bandoak: B23/2022 zenbakidunetik B25/2022 zenbakidunera arte.

- Ebazpenak: 271/2022 zenbakiko ebazpenetik (2022-10-17) 306/2022 zenbakiko ebazpenera arte (2022-11-17).

11. ESKAERAK ETA GALDERAK. BESTE UDAL ORGANOEEN KONTROLA.

Germán Castillok galdera hau egin dio idazkariari: herritar batzuen zalantzak direla-eta, zer dio legeak trafiko-seinaleei buruz? Nahitaezkoa al da elebidunak izatea? Legezkoa al da euskaraz bakarrik idatzita egotea?

Idazkariak erantzun dio Berako seinaleak bi hizkuntzetan idatzi behar direla, euskarri bakarrean edo euskarri berezietan (103/2017 Foru Dekretuaren 10.2 artikulua).

Beste aztergairik izan gabe, 20:55ak direnean, alkateak bilera bukatutzat eman du, eta nik, neronek, idazkaria naizenez, ziurtatzen dut.

O.E. ALKATEA,
Aitor Elexpuru Egaña.

IDAZKARIA,
Miguel J. Belarra Tellechea.